

Kalaallit Nunaanni sullivinni avatangiisit pillugit inatsisip allanngortinneqarnissaa pillugu inatsimmut oqaaseqaatissaq pillugu Inatsisartut aalajangiussassaattut siunnersuut

(Inuussutissarsiornermut Aatsitassanullu Naalakkersuisoq)

Saqqummiussaq**Siullermeenera**

Kalaallit Nunaanni sullivinni avatangiisit pillugit inatsisip allanngortinneqarnissaanut inatsisip atortussanngortinneqarnissaa pillugu Inatsisartut oqaaseqaatissaattut siunnersuut maanna Naalakkersuisut sinnerlugit saqqummiutissavara.

Inatsisissatut siunnersuut tulliuuttunik immikkoortoqarpoq:

- Sulisitsisup inatsimmi malittarisassat eqqortissimappagit, sulisitsisup pinerluttulerinermi inatsit naapertorlugu akisussaaffiisa killilerneqarnerat. Aammattaq sulisut piaaralutik imaluunniit sakkortuumik mianersuaalliorlutik sullivimmi avatangiisit pillugit inatsimmik unioqutitsippata, sulisup pinerluttulerinermi inatsit naapertorlugu pineqaatissinneqarnera sakkortusineqassaaq.
- Sullivimmi avatangiisit pillugit inatsimmik unioqutitsinerit ajutoornermik inuup annertuumik ajoquserneqarneranik toquneranilluunniit kinguneqartut pillugit pinerluttulerinermi inatsit naapertorlugu pineqaatissiinerit sakkortusinerat.
- Isumannaallisaanermik peqqissutsimillu sulinermi ataqatigiissaarisunut sullivimmi avatangiisit pillugit ilinniartitaanissamut tunngavissaqalerneq.
- Kalaallit Nunaanni sullivinni avatangiisit pillugit inatsit maannamut avataasiorluni sulinerlutik tunngasuupput, avataani sulliviit (qilleriviit) ilanngullugit. Kalaallit Nunaanni Namminersorlutik Oqartussat 1. januar 2010-mi atuutilersumik avataani sulineq eqqarsaatigalugu sullivimmi avatangiisit akisussaaffigilerpaat. Kalaallit Nunaanni aatsitassat ikummatissallu pillugit inatsisartut inatsisaanni erseqqissagaavoq, tassani aalajangiussassatut siunnersuut akuersissugineqartoq ilanngunneqarluni. Tamanna naapertorlugu Kalaallit Nunaanni sullivinni avatangiisit pillugit inatsimmi avataasiorluni sulinerup ilaatinneqannginnerata erseqqissaatigineqarnissaa siunnersuutigineqarpoq.
- Sulisoqarnermut ministerip akiliutit pillugit malittarisassanik aalajangersaasinnaaneranut tunngavissineq, Sullivinnik Nakkutilliisut sullivinni avatangiisit pillugit ilinniartitaanerup ingerlanneranut aningaasartuutaasa ilaasa akilernerannut sulisitsisumut akiligassiinerit taakkualu akiliutaat. Sullivinni avatangiisit pillugit ilinniartitaaneq pilersinneqarmalli, sullivinni avatangiisit pillugit suleqatigiit ilaasortai ilinniartitaanermut inatsisip naapertorlugit pisussaaffiusumut peqataagaangata, sulisitsisut akiliutaat akiligassiissutigineqartarput. Sullivinnik Nakkutilliisut akiligassiisarnerannut siusinnerusukkat paatsuugassaangitsumik

erseqqissumillu tunngavissaqartoqarsimanngilaq. Taamaasiornikkut maanna suleriaasiusoq ataatsimoortumik inatsisitigut tunngavissinneqarpoq.

Sullivinni avatangiisit pillugit inatsisip allanngortinneqarnerata Kalaallit Nunaanni atuuttussanngortinneranik Inatsisartut aalajangiissasut Naalakkersuisut kaammattuutigaat.